



UKA16/45

12. oktober 2016

Kelly Berthelsen

Inatsisartut aalajangiiffigisassaattut siunnersuut Naalakkersuisut UKA 2017-imut eqqumiitsuliortut suliaminnik pilersitsilertuinissaanut aningaasanik inatsimmit tunniunneqartartut pillugit aningaasaateqarfimmik pineqartunik agguaassisussatut inissinneqartussatut atugassiamik aningaasaateqarfiliornissaq anguniarlugu periarfissaasinnaasunik misissuinissamut Naalakkersuisut UKA2017-imut peqquneqarnissaanik Inatsisartunut aalajangiiffigisatut siunnersuut. Misissuininermi ilanngullugu misissorneqassaaq eqqumiitsuliornermut isumalioqatigiissitamik pilersitsinissaq qulaani taaneqartunik aningaasaliissutinik agguaassinissanik ingerlatsiviusussamik piviusunngortinneqarnissaa.

(Inatsisartunut ilaasortaq, Peter Olsen, Inuit Ataqatigiit)

Eqqumiitsuliorneq piginnaaneruvoq inumminut pilluaqqussutaangaartoq, amerlaqisutigulli aamma assut ilungersunartorsiortitsisartoq.

Piginnaaneruvoq inumminut nuannaarutaasartoq avatangiisinut annertuumik tunisiffiusarami, nuannaarutissanik imaluunniit isumalioqqutissanik. Piginnaaneruvoq inumminut pilluaqqussutaasartoq ilaanni nersugaanermik pisuussutinillu nassataqartarami.

Amerlasoorpassuartigulli eqqumiitsuliortut inuuniarnerminni nalorninartorsiortuarlutik inuusarput, ilarpassuisami nalusarpaat ilumut aqagumut naammattunik isertitassaqarumaanerlutik, imaluunniit ilumut isertitaqassanerlutik. Eqqumiitsuliortulli piginnaanini sungiusartuarnermigut pigiliussani, imaluunniit inunnguuseralugit pigiliussani assortuinnarneq sapersaramigit inuuneq oqitsuinnaanngitsoq toqqartariaqartarpaa piginnaanini inuiaqatiminut imminullu nuannaarutaqqullugit.

Silamiut oqaluttuarisaaneranni eqqumiitsuliortorsuit maannamut tusaamasaasut ikinngitsut timip piisigut ajorsaateqaqalutik inuunertik naasarpaat suliatik pingaartilluinnakkatik iperarumanginnamikkitt. Erinniortorsuaq Johan Sebastian Bach qalipaasorsuarlu Vincent Van Gogh, eqqaaginnarsinnaavavut. Uagulli nammineq aamma akornatsinni eqqumiitsuliortorsuartaqartarpugut naliminni naleqquttumik qujaffigineqanngitsoortunik kingornamulli inuiannut pingaaruteqangaartunik. Matumani ilaatigut eqqarsaatigaara qalipaasorsuaq Aalut Kangermiu. Kisianni, qassimmita piginnaaneqarluarlutik piginnaanerminnik ineriartortitsinngitsoortarpat taamalu eqqumiitsuliortutut sulilinngitsoortarpat inuuniutissaqarnissartik qularutigisaramikku.

Qujanartumilli inuiaqatigiit paasinnillutik eqqumiitsuliortortaminnut ikiuukkumallutik aalajangertarput. Naalagaaffeqativut danskit eqqumiitsuliortunik piginnaaneqarluartunik aningaasanut inatsisikkut aalajangersimasumik pisataqalersitsisarput, nunaqqativullu qassissunnguit iluanaarlutik taamaalillutik inuussutissaqartitaasarput taamalu aqagussamut

INUIT ATAQATIGIIT

INATSISARTUNI



eqqasunnatik eqqumiitsuliaminnik ingerlatsisinnaangortarlutik. Aamma aningaasaateqarfiit eqqumiitsuliortunit qinnuteqarfineqarsinnaasarput. Nunalu nersugarisartagarput aamma eqqumiitsuliortunut aalajangersimasumik akissarsiaqartitsisartoq Island taamaaliornermigut iluatsilluarsimavoq tassami eqqumiitsuliortut angusarissaartalerput kiisalu nunap immi ingerlaneranut aningaasatigut iluaqutaalluarterlutik.

2016-mut aningaasanut inatsimmi eqqumiitsuliortut sulinerannut toqqaannartumik aningaasaliissutit 1.140.000 kr.-iupput, qaammammullu 22.000-ikkaarlugit ukiumut aningaasaliisoqartarsimmata inuit sisamat ukiut eqqumiitsuliortut sulisinneqarsinnaapput.

Qanorli eqqumiitsuliortunut pingaartumilli inuainnut tamanut pisuunguallaataatigissagaluarpa eqqumiitsuliortut assersuutigalugu ukiumut qulit eqqissillutik eqqumiitsuliorneq kisiat sammisnaaleraluarpassuk. Aamma isumassarsiat ilaanni tassanngaanaq takkuttarmata sulinissamullu kajumissuseq attattuaannarneqarsinnaangimmat eqqumiitsuliortunut inuiaqatigiinnullu pissarsiaqaataassagaluaqaaq assersuutigalugu atortussarsiutissanut pilertortumik qinnuteqaaterpassuit atoqqaanngikkaluarlugit aningaasaliisinnaasumik aningaasaateqarfeqaleraluarpat.

Naalakkersuisut akissuteqarnerminni unnerput namminneq siunnersuisoqatigiinnik pilersitsilersaaramik taamalu suliaq ingerlareerpat siunnersuutip itigartinneqarnissaa kaammattuutigitsigik. Kisianni ukiut tamarluinnaasa aningaasanut inatsit isumaqatigiinniutigineqartarpoq taavalu politikikkut isummertarneq malillugu tulleriiaariffiusarluni. Tassa eqqumiitsuliortut aningaasaliiffigineqassanersut politikkerit assaanniilersarpoq.

Eqqumiitsuliortunut inuiaqatigiinnullu pisuunnguallaataassagaluaqaaq politikikkut pissutsit, politikkerillu isumaat apeqqutaajunnaarsillugit eqqumiitsuliortut qularnaatsumik inuuniutissaqartinneqaleraluarpata. Politik apeqqutaatinnagu inuiaqatigiit eqqumiitsuliornikkut ingerlassapput. Siunnersuisoqatigiit aningaasanik politikkerinit aalajangigaasunik agguaassisarnerannut taarsiullugu aningaasaateqarfiliorniarta eqqumiitsuliortut amerlanerusut iluaqutigisinnaasaannik. Inuiaat namminersorumasut politikikkuinnaq ineriartussanngillat, immaqami anersaakkut ineriartornissaq suli pingaerneruvoq.

Aningaasaateqarfiup qanoq pilersinneqarnissaa pillugu ataatsimiititaliami makku isumaliutigeqqullugit kaammattuutigineqarsinnaapput: Namminersorlutik Oqartussat erniortussanik ukiuni tulleriinni aalajangersimasunik aningaasaliisassapput. Tamatuma saniatigut aningaasaateqarfiit eqqumiitsuliornermut aningaasaliisartut aperineqassapput aningaasaateqarfimmut aningaasaleeqataajumanersut.

Taama oqaaseqarluta siunnersuutip ataatsimiititaliamut ingerlateqqinneqarnissaa Inuit Ataqatigiinniit siunnersuutigissavarput.